

COMISIÓN INFORMATIVA DE TURISMO, TERMALISMO E MEDIO AMBIENTE

ACTA da mencionada comisión informativa, correspondente ao día **19 de febreiro de 2025**

Ás 18.20 horas do día 19 de febreiro de 2025, reúnese a Comisión Informativa de Turismo, Termalismo e Medio Ambiente, en sesión ordinaria, na sala de xuntas da Deputación Provincial, coa asistencia dos seguintes deputados e deputadas:

Presidente: D. Luís Menor Pérez

Deputados/as do Grupo Popular:

D. Rosendo Luís Fernández Fernández

D.^a Marta Nóvoa Iglesias

D.^a Patricia Torres Madureira

D.^a M.^a del Carmen González Quintela

D. Manuel Seoane Rodríguez

Deputados/as do Grupo Socialista:

D. Emilio Luís Díaz Vidal

D.^a Susana Rodríguez Estévez

D. Aurentino Alonso Araújo

D. Álvaro Vila Araújo

Deputados/as do BNG:

D.^a María José Mangana Guede

D. Xosé Manuel Puga González

Deputados de Democracia Ourensana:

D. Antonio Fernández Martín

D. Gonzalo Pérez Jácome

Secretario: D. Juan Marquina Fuentes

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á DO DÍA 21 DE XANEIRO DE 2025.-

A Secretaría Xeral deu traslado do borrador da acta da sesión anterior, correspondente á ordinaria do día 21 de xaneiro de 2025.

Non se producen intervencións e, por unanimidade, a comisión adopta o seguinte acordo:
Aprobar a acta da sesión ordinaria da Comisión Informativa de Turismo, Termalismo e Medio Ambiente do día 21 de xaneiro de 2025, conforme co borrador elaborado pola Secretaría Xeral.

2º.- APROBACIÓN DO CONVENIO DE COOPERACIÓN ENTRE A DEPUTACIÓN PROVINCIAL DE OURENSE E OS CONCELLOS DE CENLLE, PUNXÍN E SAN AMARO PARA CONTRATAR O SERVIZO DE EXPLOTACIÓN E MANTEMENTO E DO SUBMINISTRO DE ENERXÍA ELÉCTRICA DAS INSTALACIÓNS DE ABASTECIMENTO EN ALTA “RAZAMONDE-SAN TROCADO”.

D.ª Ana Patricia Torres Madureira, do Grupo Popular, expón o contido da proposta da Presidencia.

Non se producen intervencións e co voto favorable do Grupo Popular (6) e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

1.- Aprobar o convenio de cooperación entre a Deputación Provincial de Ourense e os concellos de Cenlle, Punxín e San Amaro para contratar o servizo de explotación e mantemento e do subministro de enerxía eléctrica das instalacións de abastecemento en alta “Razamonde-San Trocado”, co seguinte contido:

1ª) Obxecto.-

Constitúe o obxecto do presente convenio establecer o marco regulador da delegación na Deputación Provincial de Ourense do exercicio das competencias dos concellos de Cenlle, Punxín e San Amaro para que a Deputación contrate o servizo de explotación e mantemento das instalacións de abastecemento en alta “Razamonde-San Trocado” (en adiante infraestrutura) e do subministro da enerxía eléctrica, como fórmula de cooperación da Deputación cos concellos para garantir a calidade na prestación deste servizo.

2º) Suxeitos parte no convenio.-

Son parte no presente convenio as seguintes administracións públicas:

a) Os concellos de Cenlle, Punxín e San Amaro que actúan no exercicio das competencias que lles corresponden para prestar o servizo de abastecemento de auga potable, de conformidade co establecido nos artigos 26.1.a) da Lei 7/1985, de 2 de abril Reguladora das

bases de réxime local e 27.1 e 27.2.b) da Lei 9/2010, de 4 de novembro, de Augas de Galicia.

b) A Deputación Provincial de Ourense, que actúa no exercicio das súas competencias de cooperación e asistencia aos municipios previstas no artigo 36.1.b) da Lei 7/1985, de 2 de abril, reguladora das Bases do Réxime Local, en relación co disposto no artigo 195.i) da Lei 5/1997, de 22 de xullo, de Administración Local de Galicia, que expresamente prevé a delegación de competencias como técnica de colaboración e cooperación entre as entidades locais galegas.

3º) Contido da delegación de competencias establecida no presente convenio.

En virtude do presente convenio, os Concellos de Cenlle, Punxín e San Amaro delegan na Deputación Provincial de Ourense o exercicio das competencias para realizar os actos seguintes:

a) Contratar o servizo de explotación da infraestrutura cunha empresa especializada, incluíndo o mantemento preventivo de equipos e obra civil así como tratamento de caudais durante un período de dous anos prorrogable, por mutuo acordo das partes, por outros dous anos mais.

A delegación das competencias para contratar o servizo comprende o exercicio de todas as facultades que como órgano de contratación lle corresponden aos concellos de Cenlle, Punxín e San Amaro en relación coa contratación para prestar o servizo de explotación e mantemento preventivo da infraestrutura, incluíndo a realización de todos os actos de preparación do expediente de contratación, licitación e adxudicación, modificación, interpretación e resolución do contrato, seguimento e control do seu cumprimento e, en xeral, todos os actos que en relación co dito contrato lle corresponden ao órgano de contratación, incluíndo a resolución dos recursos contra os ditos actos, cando proceda.

No exercicio desta delegación, a Deputación Provincial elaborará un proxecto de expediente de licitación, que incluírá os pregos de cláusulas administrativas e prescricións técnicas. O proxecto de expediente será sometido, previamente á súa aprobación, á conformidade por parte dos órganos municipais competentes en materia de contratación. A Deputación non poderá aprobar o expediente e á licitación do contrato sen a dita conformidade previa.

b) Contratar a subministración da enerxía eléctrica necesaria para o funcionamento da infraestrutura, que se realizará na modalidade que a Deputación teña establecida para as súas subministracións.

c) Manter correctivamente as instalacións intermunicipais (tanto para reparar como para substituír) por calquera das fórmulas legalmente posibles (execución por administración,

contrato con terceiros ou encomenda á concesionaria provincial –Sociedade provincial de Augas e Medio ambiente SA). Esta competencia abarca dende o acordo de execución ata a propia execución. Para as actuacións con importe superior a 20.000 € requirirase o visto e prace dos tres concellos ou a validación da Comisión de seguimento, vixilancia e control do convenio.

d) O control analítico das augas subministradas en alta pola instalación, que se realizará consonte ao Programa de asistencia ás entidades locais para a xestión dos servizos municipais do ciclo hidráulico, que anualmente se aprobe.

e) Subscrición do seguro de responsabilidade civil das instalacións, mediante inclusión destas na póliza que a Deputación manteña para as infraestruturas xestionadas por ela.

A comisión de seguimento do convenio poderá establecer un protocolo de actuación para comunicar as incidencias nos elementos electromecánicos e na obra civil da infraestrutura, así como para estudar as fórmulas para resolver estas incidencias.

4º) Réxime económico da delegación.-

1. A Deputación repercutirá aos concellos delegantes os custes efectivos resultantes dos contratos delegados (apartados a) e b) da cláusula anterior) e dos servizos prestados (apartados c) e d) da cláusula anterior).

O reparto destes custes farase en función da participación dos concellos en relación do peso que cada un deles ten no proxecto da instalación para a potencial demanda de auga, conforme ás regras seguintes:

a) Os custes fixos (derivados do contrato do servizo de explotación e mantemento da infraestrutura, termo de enerxía e control analítico) así como os das actuacións de reparación e/ou substitución, repartiranse conforme as seguintes porcentaxes:

40% Cenlle

25% Punxín

35% San Amaro

b) Os custes variables (termo de enerxía no contrato de subministro de enerxía eléctrica) distribuiránse segundo os m³ de auga demandada da infraestrutura por cada concello. Para estes efectos, na liquidación a Deputación establecerá o custe do metro cúbico, dividindo o custe variable total soportado polo volume demandado no período de liquidación de referencia segundo o punto entrega.

A Deputación Provincial de Ourense asumirá os gastos da tramitación da contratación delegada que realice cos seus medios propios, persoais ou materiais, incluíndo os custos

asumidos pola Deputación para realizar os actos preparatorios e de control do contrato, así como da póliza de RC.

2. A repercusión dos custes realizarase pola Deputación mediante liquidación trimestral, que será notificada aos concellos unha vez realizada esta (en función da facturación dos contratos), dispoñendo estes dun prazo de trinta días hábiles para o seu pagamento.

En caso de falla de pago en prazo, a Deputación Provincial poderá exercer as accións administrativas e xudiciais oportunas para o cobro da débeda, incluíndo, de se lo caso, a execución das garantías constituídas polos concellos conforme ao establecido no apartado seguinte, ou a compensación cos créditos de que dispoñan os concellos fronte á facenda provincial.

3. Os concellos garantirán as obrigas económicas derivadas do presente convenio mediante algunha das seguintes fórmulas:

a) Os concellos que teñan delegada na Deputación a xestión tributaria e recadación dos seus tributos, poderán constituír a garantía con cargo á recadación destes, sempre que o volume estimado dos tributos delegados sexa suficiente para cubrir as obrigas derivadas do convenio. A tal efecto, no acordo de aprobación do presente convenio, os concellos deberán autorizar expresamente á Deputación a deducir dos tributos recadados por delegación o importe non satisfeito en período voluntario das liquidacións de gastos derivados deste convenio.

A aprobación do convenio por parte da Deputación queda suxeita á emisión de informe pola Área de Facenda - Tesourería en canto á suficiencia da garantía prestada nesta modalidade.

No suposto de concellos que delegasen a xestión tributaria e recadación de determinados tributos, cuxo importe segundo o último padrón tributario sexa insuficiente para garantir as obrigas económicas derivadas do presente convenio, deberán igualmente constituír garantía polo importe da diferenza resultante nalgunha das fórmulas establecidas no apartado seguinte.

b) Alternativamente á garantía establecida no apartado a), os concellos poderán constituír calquera das seguintes:

- Aval prestado por entidade de crédito, polo importe total das obrigas económicas derivadas do convenio, executable directamente a requirimento da Deputación.
- Seguro de caución polo importe total das obrigas económicas derivadas do convenio, executable directamente a requirimento da Deputación.

- Acordo de afectación da participación en tributos do Estado ou da Comunidade Autónoma do concello, polo que se autorice á Deputación a requirir ao seu favor o ingreso das cantidades debidas, sendo título executivo suficiente a certificación de descuberto expedida pola Intervención provincial. O acordo deberá afectar a participación en tributos ata o importe das obrigas económicas derivadas do convenio, e para a súa validez deberá acompañarse de certificación expedida polo secretario – interventor do concello no que se expresen as débedas líquidas, vencidas e esixibles do concello coa Administración Xeral do Estado e calquera dos seus entes dependentes, a Comunidade Autónoma e calquera dos seus entes dependentes e a Tesourería da Seguridade Social, e se acredite que a cantidade afectada da participación en tributos do Estado ou da Comunidade Autónoma, segundo o caso, non se atopa xa afecta ó cumprimento doutras obrigas de calquera clase.

4. Para os efectos do establecido no apartado 3 desta cláusula, o importe das obrigas económicas derivadas do presente convenio se establece, para cada concello, nas seguintes contías:

Cenlle: cen mil euros (100.000 €)

Punxín: sesenta mil euros (60.000 €)

San Amaro: noventa mil euros (90.000 €)

As garantías establecidas para a válida aprobación do convenio deberá acadar o importe sinalado. Sen prexuízo disto, os concellos poderán actualizar á baixa as garantías constituídas nos seguintes supostos:

a) Unha vez adxudicado o contrato de servizos, en función da baixa obtida pola Deputación na licitación.

b) A medida que se vaian aboando as liquidacións trimestrais de custes, polo importe efectivamente aboado.

No suposto a), a Deputación comunicará aos concellos a baixa obtida e a rebaixa do importe da garantía resultante, de se lo caso, podendo a partir deste momento os concellos proceder directamente ao reaxuste da garantía, comunicándollo á Deputación.

No suposto b), os concellos poderán proceder ao reaxuste das garantías de modo directo, comunicándollo á Deputación.

5ª) Vixencia temporal do convenio.

O presente convenio terá unha duración de catro anos, contados a partir da data da súa formalización podendo prorrogarse nos termos e prazos establecidos na Lei 40/2015, de 1 de outubro de Réxime Xurídico do Sector Público.

6ª) Eficacia temporal das delegacións de competencia contidas no presente convenio.-

As delegacións de competencias outorgadas á Deputación Provincial a través do presente convenio producirán efecto nos seguintes termos:

- a) A delegación do exercicio das competencias para preparar o expediente de contratación terá efectos a partir do día seguinte ao da formalización do convenio.
- b) A delegación do exercicio das competencias para licitar e adxudicar o contrato do servizo, terá efectos a partir do día seguinte ao da adopción polo órgano municipal competente do acordo de conformidade co proxecto de expediente de contratación.

7ª) Causas de resolución do convenio.

O presente convenio resolverase polas causas establecidas no artigo 51 da Lei de Réxime Xurídico do Sector Público.

En caso de resolución anticipada do convenio, os concellos subrogaranse nos contratos delegados adxudicados pola Deputación.

8ª) Comisión de seguimento, control e vixilancia.

Establécese unha comisión de seguimento, control e vixilancia paritaria do convenio, que estará integrada polo deputado – delegado con delegación especial nesta materia e un representante de cada concello designado polos respectivos alcaldes.

A comisión estará asistida polo director da Área de Medio Ambiente, a xefa de servizo de Medio Ambiente e o xefe da Sección de Augas, con voz pero sen voto.

Os representantes dos concellos poderán asistir ás sesións acompañados de membros do goberno municipal ou técnicos asesores.

Actuará como secretaria da comisión a xefa do Gabinete de asesoría xurídica e asistencia a municipios, coas funcións propias da secretaría de órgano colexiado.

A comisión de seguimento reunirase a pedimento de calquera das partes integrantes, e as súas funcións serán as de seguimento da aplicación do convenio, interpretación e resolución de incidencias. No caso de non acadarse un acordo no seo da comisión, a Deputación Provincial resolverá unilateralmente e con carácter executivo o que proceda, sen prexuízo da posibilidade de impugnación deste acto administrativo polos concellos, conforme co sistema de recursos vixente no noso ordenamento xurídico.

Serán de aplicación ao funcionamento da comisión as normas sobre órganos colexiados recollidas na sección 3ª do capítulo II do Título Preliminar da Lei 40/2015, de 1 de outubro, de Réxime Xurídico do Sector Público, sen prexuízo de que a comisión poida establecer as súas propias normas de funcionamento.

9ª) Réxime xurídico.

O presente convenio terá natureza administrativa, correspondendo á xurisdición contencioso administrativa a resolución das controversias sobre a súa validez, eficacia, efectos e extinción, así como respecto dos actos de aplicación adoptados pola comisión ou polas administracións públicas que o subscriben.

2. Ordenar que se publique este convenio no Boletín Oficial da Provincia, na sede electrónica desta Deputación Provincial e se inscriba no Rexistro de Convenios da Deputación Provincial de Ourense.

3º.- MOCIÓN DE URXENCIA.- Non se presentan.

4º.- ROGOS E PREGUNTAS.- Non se formulan.

E, ás 18.22 horas, dáse por finalizada a reunión, redactándose a presente acta que se asinará electronicamente. Dou fe.